



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

42. Kalenderwoche – ab 18. Oktober 2009

Sexisch for juh

Nee, ährlisch, das dud ooch ma Zeid wern, dass dähr Deddmeyor in seim Gabaredd im Hedwischhof endlich ma e Brogramm machen dud, was wo de ganze Broblemaddig vom Sexischn behandeln dud. Grade in dor heidischn Zeid, wo de Schbrache dährardisch durschgebandschd wern dud, da muss ma bißl eene Oriendierung nein - eene Linie! De neue Reschdschreibung dud da absoluhd keene Bunkde bring, was ehm das Diebische am Sexischn bedreffn dud. Un das is ooch desvorweschn so, weil es ehm nisch bloß das Sexische gehm dud, sondorn ooch noch das Anglor-Sexische! Das is das, was de Anglsachsn redn dun - driehm in England un Umgähbung!

Das Anglor-Sexische dud ja immor mähr in unsore Heimadschbrache hineindringen. Es wird immor schwähror fiehr een Sachsn e reenes Sexisch hinzuschmeddorn. Ohne Anglor-Sexisch duds fasd nisch mähr gehn. Alleene bei de Gombjudor! Da mußde im Anglor-Sexischn schon ziehmlisch berfeggd sein, wensde da alles vorschdehn willsd.

Mansche dun ja das, was mir in Deutschland middlorweile redn dun... also, jedzde nisch bloß mir in Sachsn... nee, alle in Os dun Wesd! - das dun mansche Denglich nenn! Denglich!

Also, eene Greizung aus Deusch un Englisch.

Un mansche dun daderdriebor nu ganz embeehrd sein. De deutsche Schbrache däde vorgewaldischd wern... endwurzld... vorhohnebiebeld... - un aus reschde Greise komm dann so Vorwirfe, dass de volksdeutsche Gemeinschafd undorwandord wern dud - von ausländische Worde! Das däde de volksdeutsche Gulduhr beschähdischn!

Naja, nee, das säh isch nisch ganz so drammadisch. Das dud doch ganz eenfach mid dähr Globallesierung zusammhäng. Un mid dor Migroelegdronig! Das Anglor-Sexische - beziehungsweise das Englische - das is numa de Schbrache von de Gombjudor. Da missn ja sogahr de Schinehsn midmachn. Obwohl die ja nischma eene Schbrache ham. Die ham ja bloß Bildor! Ja, die dun in Bildorn redn. Das is beschdimmd nisch eenfach. Abor ooch die dun sisch dähm Anglor-Sexischn annähorn. Wie mir ooch. Das is ehm so.

Abor off dor annorn Seide missde ehm werglisch e bißl Ordnung neinkomm in de Schbrache. Odor wenischsdens in de Schreibe!

Zeidunglesn is ja schon wie Greizwordrädsl machn. Ja, weschn dähr Greizung von alle meeschlischn Schbrachn. An die jeweilisch Fremdworde missde eischendlich immor dranschdehn, wose hährkomm dun. Das siehsde doch eim Word nisch offm erschdn Bligg an, wos hährkomm dud. Villeischd missde jedes Word noch so een kleen Vormerg krischn... wie am Nummornschild von de Audos, wo mor de Nadsjonalidäd erkenn kann. "D" fiehr Deudsch, "A" fiehr Anglor-Sexisch. "Sch" fierh Schinehsisch... un so weidor. Da weeißde dann ehm gleisch, das Fladdrahde nisch Fladdrahde heeßn dud, sondorn Fledreed, weils ehm ausm Anglor-Sexischn is.

Eduard Sachsenmeyer